

解拳論

陳那菩薩造

陳三藏法師真諦譯

三界者唯以言名爲體由強分別非實有法故不得真由揀擇門諸法自性爲生不顛倒智故立此論

於藤起蛇知 見藤則無境

昏昧時中在非遠處於藤色形見似蛇相爲境所誑未見差別謂彼是蛇生決定解若見藤異相不如分別故虛妄生故昔解但是亂知則無有境

若見藤分已 藤知如蛇知

若分分思量析此藤境藤體不可得若無體此藤知如蛇知但是亂知於藤諸分中亦如是思量分析體相不可得故此知緣藤及藤

分悉是亂知

連四

一切假名類 揀擇自性時 假名從他起

乃至俗智境

依分分析觀察藤等不見自體故如蛇知此藤等知但是亂知實無有境一切假名有法瓶衣人等若觀瓶等諸分乃至俗智境在及最後分此中瓶等假名從他而起最後無分析難顯離皆無一切假名類最後分無分析唯一鄰虛若離一大餘大及一大並不可顯現無有體故如兔角等其異云何鄰虛者不可立爲一物若有物必有方異猶如瓶等瓶等諸物是世間有有六方異是故有分不成一物若鄰虛是有應有六方則是有分不成一物若不成一物則爲多物所成與瓶不異亦無實體

智人於俗境 勿起真實意

由此三界唯有散亂若智人欲求解脫不應起真實計問曰有亂識答若汝言我信瓶等外物自性不可得故但有分別亂識緣無境起何以故幻化人乾闥婆城等實非有亂識

遠四

十一

似幻等起而非無是義不然以不成就故云何不成就如所見不如是有故此亂識似無物由物無體云何識得有如所緣塵自性能緣自性亦如是所緣塵既無此亂識不能自起由他功力他既不成起義何在以是義故亂識有義云何得立於世間無如此法種子等生因若無所生芽等果是有則無是處是故說幻化等譬亦不可立
一切假名物 若細心思量 智人欲等惑能除如蛇怖

猶如是說已識三界但假名除瓶等麤識習微細心如世間所立瓶衣等物由假名有約世俗心不違此事後爲遣此俗心方起揀擇心但見唯有亂識無有外塵此亂識因不成就故似無物故體則不成就內外既無所有得會法空一切分別不作欲等諸惑智人易除譬如於藤妄起蛇想而生怖畏若見差別定知是藤能除蛇怖由思量能起欲等諸塵自性速易能滅欲等惑妄亦復如是
智人不違世 隨說世間法 若欲滅惑障依真應觀察

如世間瓶衣等物信有不違或說示他如此智人先隨此事後若求解脫應修真理揀擇世法自性若如理揀擇現起惑滅未起不生是立論用

解拳論

三

二